

摘藻堂四庫全書薈要

經部

欽定四庫全書薈要

經部
四書通旨卷六



詳校官主事銜臣徐以坤

欽定四庫全書蒼齋要卷三千一百二十五

經部

四書通旨卷六

元 朱公遷 撰

出處去就

篤信好學守死善道危邦不入亂邦不居天下有道則

見無道則隱邦有道貧且賤焉恥也邦無道富且貴焉

恥也

泰伯

仕而優則學學而優則仕

張子

子使漆雕開

仕對曰吾斯之未能信子說

公冶長

子路使子羔為費

宰子曰賊夫人之子先

右明體用之學

愚案孔子之言體用貴乎兼備子夏之言體用貴乎相資若漆雕開可以仕而未肯仕則夫子說其篤志子羔未可以仕而使之仕則夫子以謂賊夫人其輕重先後又如此

用之則行舍之則藏惟我與爾有是夫子路曰子行三軍則誰與子曰暴虎馮河死而無悔者吾不與也必也

臨事而懼好謀而成者也

而述

有美玉於斯韞匱而藏

諸求善賈而沽諸子曰沽之哉沽之哉我待賈者也

罕子

憲問恥子曰邦有道穀邦無道穀恥也 賢者辟世

其次辟地其次辟色其次辟言

並憲問

古之君子何如

則仕孟子曰所就三所去三迎之致敬以有禮言將行

其言也則就之禮貌未衰言弗行也則去之其次雖未

行其言也迎之致敬以有禮則就之禮貌衰則去之其

下朝不食夕不食饑餓不能出門戶君聞之曰吾大者

不能行其道又不能從其言也使饑餓於我土地吾恥之周之亦可受也免死而已矣

告子下

右明處物之義

愚謂用行舍藏待賈而沽三就三去皆以彼已遇合言賢者辟世以下及荅原憲之語皆兼時勢可

否言

色斯舉矣翔而後集

鄉黨

無罪而殺士則大夫可以去

無罪而戮民則士可以徙

離婁下

右明見幾之智

天下有道以道殉身天下無道以身殉道未聞以道殉
乎人者也

盡心上

不見諸侯宜若小然今一見之大則

以王小則以霸且志曰枉尺而直尋宜若可為也孟子
曰昔齊景公田招虞人以旌不至將殺之志士不忘在
溝壑勇士不忘喪其元孔子奚取焉取非其招不往也
如不待其招而往何哉且夫枉尺而直尋者以利言也
如以利則枉尋直尺而利亦可為與昔者趙簡子使王

良與嬖奚乘終日而不獲一禽嬖奚反命曰天下之賤
工也或以告王良良曰請復之強而後可一朝而獲十
禽嬖奚反命曰天下之良工也簡子曰我使掌與女乘
謂王良良不可曰吾為之範我馳驅終日不獲一為之
詭遇一朝而獲十詩云不失其馳舍矢如破我不貫與
小人乘請辭御者且羞與射者比比而得禽獸雖若丘
陵弗為也如枉道而從彼何也且子過矣枉已者未有
能直人者也 古之君子仕乎孟子曰仕傳曰孔子三

月無君則皇皇如也出疆必載質公明儀曰古之人三
月無君則弔三月無君則弔不以急乎曰士之失位也
猶諸侯之失國家也禮曰諸侯耕助以供粢盛夫人蠶
繅以為衣服犧牲不成粢盛不潔衣服不備不敢以祭
惟士無田則亦不祭牲殺器皿衣服不備不敢以祭則
不敢以宴亦不足弔乎出疆必載質何也曰士之仕也
猶農夫之耕也農夫豈為出疆舍其耒耜哉曰晉國亦
仕國也未嘗聞仕如此其急仕如此其急也君子之難

任何也曰丈夫生而願為之有室女子生而願為之有家父母之心人皆有之不待父母之命媒妁之言鑽穴

隙相窺踰牆相從則父母國人皆賤之古之人未嘗不

欲仕也又惡不由其道不由其道而往者與鑽穴隙之

類也

並滕文公下

男女授受不親禮與孟子曰禮也曰嫂

溺則援之以手乎曰嫂溺不援是豺狼也男女授受不

親禮也嫂溺援之以手者權也曰今天下溺矣夫子之

不援何也曰天下溺援之以道嫂溺援之以手子欲手

援天下乎

離婁上

公孫衍張儀豈不誠大丈夫哉一怒

而諸侯懼安居而天下熄孟子曰是焉得為大丈夫乎
子未學禮乎丈夫之冠也父命之女子之嫁也母命之
往送之門戒之曰往之女家必敬必戒無違夫子以順
為正者妾婦之道也居天下之廣居立天下之正位行
天下之大道得志與民由之不得志獨行其道富貴不
能淫貧賤不能移威武不能屈此之謂大丈夫

滕文公下

敢問不見諸侯何義也孟子曰在國曰市井之臣在野

曰草莽之臣皆謂庶人庶人不傳質為臣不敢見於諸侯禮也萬章曰庶人召之役則往役君欲見之召之則不往見之何也曰往役義也往見不義也且君之欲見之也何為也哉曰為其多聞也為其賢也曰為其多聞也則天子不召師而況諸侯乎為其賢也則吾未聞欲見賢而召之也繆公亟見於子思曰古千乘之國以友士何如子思不悅曰古之人有言曰事之云乎豈曰友之云乎子思之不悅也豈不曰以位則子君也我臣也

何敢與君友也以德則子事我者也奚可以與我友千
乘之君求與之友而不可得也而况可召與齊景公田
招虞人以旌不至將殺之志士不忘在溝壑勇士不忘
喪其元孔子奚取焉取非其招不往也曰敢問招虞人
何以曰以皮冠庶人以旃士以旂大夫以旌以大夫之
招招虞人虞人死不敢往以士之招招庶人庶人豈敢
往哉況乎以不賢人之招招賢人乎欲見賢人而不以
其道猶欲其入而閉之門也夫義路也禮門也惟君子

能由是路出入是門也詩云周道如底其直如矢君子所履小人所視萬章曰孔子君命名不俟駕而行然則孔子非與曰孔子當仕有官職而以其官名之也

萬章下

右明守正之義

古之賢王好善而忘勢古之賢士何獨不然樂其道而忘人之勢故王公不致敬盡禮則不得亟見之見且猶不得亟而況得而臣之乎○子好遊乎吾語子遊人知之亦囂囂人不知亦囂囂曰何如斯可以囂囂矣曰尊

德樂義則可以翼翼矣故士窮不失義達不離道窮不
失義故士得已焉達不離道故民不失望焉古之人得
志澤加於民不得志修身見於世窮則獨善其身達則
兼善天下

並盡
心上

右明內外輕重之分

先名實者為人也後名實者自為也夫子在三卿之中
名實未加於上下而去之仁者固如此乎孟子曰居下
位不以賢事不肖者伯夷也五就湯五就桀者伊尹也

不惡汙君不辭小官者柳下惠也三子者不同道其趨
一也一者何也曰仁也君子亦仁而已矣何必同曰魯
繆公之時公儀子為政子柳子思為臣魯之削也滋甚
若是乎賢者之無益於國也曰虞不用百里奚而亡秦
穆公用之而霸不用賢則亡削何可得與曰昔者王豹
處於淇而河西善謳縣駒處於高唐而齊右善歌華周
杞梁之妻善哭其夫而變國俗有諸內必形諸外為其
事而無其功者髡未嘗覩之也是故無賢者也有則髡

必識之曰孔子為魯司寇不用從而祭燔肉不至不稅冕而行不知者以為為肉也其知者以為為無禮也乃孔子則欲以微罪行不欲為苟去君子之所為衆人固不識也

告子下

右明仁賢之心

不見諸侯何義孟子曰古者不為臣不見段干木踰垣而辟之泄柳閉門而不內是皆已甚迫斯可以見矣陽貨欲見孔子而惡無禮大夫有賜於士不得受於其家

則往拜其門陽貨矚孔子之亡也而饋孔子蒸豚孔子亦矚其亡也而往拜之當是時陽貨先豈得不見曾子曰脅肩諂笑病於夏畦子路曰未同而言觀其色赧赧然非由之所知也由是觀之則君子之所養可知已矣

滕文公下

右明中正之道

仕非為貧也而有時乎為貧娶妻非為養也而有時乎為養為貧者辭尊居卑辭富居貧辭尊居卑辭富居貧

惡乎宜乎抱關擊柝孔子嘗為委吏矣曰會計當而已
矣嘗為乘田矣曰牛羊茁壯長而已矣位卑而言高罪
也立乎人之本朝而道不行恥也

萬章下

右專言為貧而仕之義

子奚不為政子曰書云孝乎惟孝友于兄弟施于有政
是亦為政奚其為為政

為政

齊景公待孔子曰若季氏

則吾不能以季孟之間待之曰吾老矣不能用也孔子

行○齊人歸女樂季桓子受之三日不朝孔子行

並微子

衛靈公問陳於孔子孔子對曰俎豆之事則嘗聞之

矣軍旅之事未之學也明日遂行

衛靈公

季氏使閔子

騫為費宰閔子騫曰善為我辭焉如有復我者則吾必

在汶上矣

雍也

孟子去齊宿於晝有欲為王留行者坐

而言不應隱几而卧客不悅曰弟子齊宿而後敢言夫

子卧而不聽請勿復敢見矣曰坐我明語子昔者魯繆

公無人乎子思之側則不能安子思泄柳申詳無人乎

繆公之側則不能安其身子為長者慮而不及子思子

絕長者乎長者絕子乎○孟子去齊居休公孫丑問曰
仕而不受祿古之道乎曰非也於崇吾得見王退而有
去志不欲變故不受也繼而有師命不可以請久於齊
非我志也

並公孫丑

齊饑陳臻曰國人皆以夫子將復為

發棠殆不可復孟子曰是為馮婦也晉人有馮婦者善
搏虎卒為善士則之野有衆逐虎虎負嵎莫之敢撻望
見馮婦趨而迎之馮婦攘臂下車衆皆悅之其為士者

笑之

盡心下

右聖賢見幾之智

愚謂此皆於智之中有制事之義若孔子去魯遲
遲吾行與燔肉不至不稅冕而行則智之中有愛
君之仁 又案齊人歸女樂孔子行是孔子所以
去之本意燔肉不至而孔子行則以明其用心之
忠且厚也

孔子之仕也非事道與曰事道也事道奚獵較也曰孔
子先薄正祭器不以四方之食供薄正曰奚不去也曰

為之兆也兆足以行矣而不行而後去是以未嘗有所

終三年淹也孔子有見行可之仕有際可之仕有公養

之仕於季桓子見行可之仕也於衛靈公際可之仕也

於衛孝公公養之仕也○孔子之去齊接淅而行去魯

曰遲遲吾行也去父母國之道也

並萬章下

禹稷當平世

三過其門而不入孔子賢之顏子當亂世居於陋巷一

簞食一瓢飲人不堪其憂顏子不改其樂孔子賢之孟

子曰禹稷顏回同道禹思天下有溺者由已溺之也稷

思天下有飢者由己飢之也是以如是其急也禹稷顏
子易地則皆然今有同室之人鬪者救之雖被髮纓冠
而救之可也鄉鄰有鬪者被髮纓冠而往救之則惑也
雖閉戶可也○曾子子思易地則皆然並離婁下孟子謂
蚘鼃曰子之辭靈丘而請士師似也為其可以言也今
既數月矣未可以言與蚘鼃諫於王而不用致為臣而
去齊人曰所以為蚘鼃則善矣所以自為則吾不知也
公都子以告曰吾聞之也有官守者不得其職則去有

言責者不得其言則去我無官守我無言責也則吾進
退豈不綽綽然有餘裕哉

公孫
丑下

右聖賢處物之義

愚謂禹稷顏子以時位之顯晦言曾子之與子思
孟子之視蚘蠹以地位之尊卑言孔子去齊去魯
以勢分之親疎言行可際可公養之仕以遇合之
淺深言

公山弗擾以費畔召子欲往子路不說曰未之也已何

必公山氏之之也子曰夫召我者而豈徒哉如有用我

者吾其為東周乎○佛肸召子欲往子路曰昔者由也

聞諸夫子曰親於其身為不善者君子不入也佛肸以

中牟畔子之往也如之何子曰然有是言也不曰堅乎

磨而不磷不曰白乎涅而不緇吾豈匏瓜也哉焉能繫

而不食

並陽貨

孟子去齊尹士語人曰不識王之不可

以為湯武則是不明也識其不可然且至則是干澤也

千里而見王不遇故去三宿而後出晝是何濡滯也士

則茲不悅高子以告曰夫尹士惡知子哉千里而見王

是子所欲也不遇故去豈子所欲哉子不得已也子三

宿而出畫於子心猶以為速王庶幾改之王如改諸則

必反子夫出畫而王不予追也子然後浩然有歸志子

雖然豈舍王哉王猶足用為善王如用子則豈徒齊民

安天下之民舉安王庶幾改之子日望之子豈若是小

丈夫然哉諫於其君而不受則怒悻悻然見於其面去

則窮日之力而後宿哉尹士聞之曰士誠小人也

公孫
丑下

右聖賢行道之心

愚謂此皆聖賢不忘天下之仁心也然孔子之不
果去則仁之中有智存焉孟子之不果留則仁之
中有義存焉

苟有用我者晷月而已可也三年有成

子路

道不行乘

桴浮于海從我者其由與子路聞之喜子曰由也好勇

過我無所取材

公冶長

子欲居九夷或曰陋如之何子

曰君子居之何陋之有

子路

子在陳曰歸與歸與吾黨

之小子狂簡斐然成章不知所以裁之

長公治

甚矣吾

哀也久矣吾不復夢見周公

述而

鳳鳥不至河不出圖

吾已矣夫

罕子

右聖人歎道不行之辭

儀封人請見曰君子之至於斯也吾未嘗不得見也從者見之出曰二三子何患於喪乎天下之無道也久矣天將以夫子為木鐸

八佾

公伯寮愬子路於季孫子服

景伯以告曰夫子固有惑志於公伯寮吾力猶能肆諸

市朝子曰道之將行也與命也道之將廢也與命也公

伯寮其如命何

憲問

孟子去齊充虞路問曰夫子若有

不豫色然前日虞聞諸夫子曰君子不怨天不尤人曰

彼一時此一時也五百年必有王者興其間必有名世

者由周而來七百有餘歲矣以其數則過矣以其時考

之則可矣夫天未欲平治天下也如欲平治天下當今

之世舍我其誰也吾何為不豫哉

公孫丑下

魯平公將出

嬖人臧倉者請曰他日君出則必命有司所之今乘輿

已駕矣有司未知所之敢請公曰將見孟子曰何哉君所為輕身以先於匹夫者以為賢乎禮義由賢者出而孟子之後喪踰前喪君無見焉公曰諾樂正子入見曰君奚為不見孟軻也曰或告寡人曰孟子之後喪踰前喪是以不往見也曰何哉君所謂踰者前以士後以大夫前以三鼎而後以五鼎與曰否謂棺槨衣衾之美也曰非所謂踰也貧富不同也樂正子見孟子曰克告於君君為來見也嬖人有臧倉者沮君君是以不果來也

曰行或使之止或尼之行止非人所能也吾之不過魯
侯天也臧氏之子焉能使子不過哉

梁惠
王下

右論出處而以天命決之

愚謂聖賢蓋以天命曉人封人則以天意觀聖人
者也 又案此一類專以窮達言真氏以伯寮之

愬臧倉之沮夫子莫我知之歎孟子何為不豫之

語皆為安義命之事 愚聞之叔父闕君曰不怨

天不尤人為聖人自道之辭則可若以此論聖人

則不可益不怨不尤不足以言聖人故也故充虞
又聞於孟子是孟子嘗以此教人而亦以此自居
矣中庸又以歸之素位而行之君子其所謂君子
蓋通聖賢而言者也叔父名可傳

微子去之箕子為之奴比干諫而死孔子曰殷有三仁
焉微子居下位不以賢事不肖者伯夷也五就湯五就

桀者伊尹也不惡汙君不辭小官者柳下惠也三子者
不同道其趨一也一者何也曰仁也告子直哉史魚

邦有道如矢邦無道如矢君子哉蘧伯玉邦有道則仕
邦無道則可卷而懷之

衛靈公

甯武子邦有道則知邦

無道則愚其知可及也其愚不可及也

公冶長

右論人出處而以德行稱之

餘如孟子以清和任稱夷惠伊尹亦是此類

人有言伊尹以割烹要湯有諸孟子曰否不然伊尹耕
於有莘之野而樂堯舜之道焉非其義也非其道也祿
之以天下弗顧也繫馬千駟弗視也非其義也非其道

也一介不以與人一介不以取諸人湯使人以幣聘之
囂囂然曰我何以湯之聘幣為哉我豈若處畎畝之中
由是以樂堯舜之道哉湯三使往聘之既而幡然改曰
與我處畎畝之中由是以樂堯舜之道吾豈若使是君
為堯舜之君哉吾豈若使是民為堯舜之民哉吾豈若
於吾身親見之哉天之生此民也使先知覺後知使先
覺覺後覺也予天民之先覺者也予將以斯道覺斯民
也非予覺之而誰也思天下之民匹夫匹婦有不被堯

舜之澤者若已推而內之溝中其自任以天下之重如此故就湯而說之以伐夏救民吾未聞枉己而正人者也况辱己以正天下者乎聖人之行不同也或遠或近或去或不去歸潔其身而已矣吾聞其以堯舜之道要湯未聞以割烹也伊訓曰天誅造攻自牧宮朕載自亳○或曰百里奚自鬻於秦養牲者五羊之皮食牛以要秦穆公信乎孟子曰否不然好事者為之也百里奚虞人也晉人以垂棘之璧與屈產之乘假道於虞以伐虢

宮之竒諫百里奚不諫知虞公之不可諫而去之秦年
已七十矣曾不知以食牛干秦穆公之為汙也可謂智
乎不可諫而不諫可謂不智乎知虞公之將亡而先去
之不可謂不智也時舉於秦知穆公之可與有行也而
相之可謂不智乎相秦而顯其君於天下可傳於後世
不賢而能之乎自嚮以成其君鄉黨自好者不為而謂
賢者為之乎

並萬章上

右論人出處而以事理明之

愚謂伊尹得聖人之任孟子蓋已稱之百里奚於去就之際甚明其智亦有合於聖賢者故在所取焉然王者之師伯者之佐相去亦已遠矣若此甯武子可及之知則百里又當為優也

伯夷非其君不事非其友不立於惡人之朝不與惡人言立於惡人之朝與惡人言如以朝衣朝冠坐於塗炭推惡惡之心思與鄉人立其冠不正望望然去之若將浼焉是故諸侯雖有善其辭命而至者不受也不

受也者是亦不屑就已柳下惠不羞汙君不卑小官進
不隱賢必以其道遺佚而不怨阨窮而不憫故曰爾為
爾我為我雖袒裼裸裎於我側爾焉能浼我哉故由由
然與之偕而不自失焉援而止之而止援而止之而止
者是亦不屑去已孟子曰伯夷隘柳下惠不恭隘與不
恭君子不由也

公孫
丑上

右論人出處而以一偏之弊言之

伯夷伊尹何如曰不同道非其君不事非其民不使治

則進亂則退伯夷也何事非君何使非民治亦進亂亦

進伊尹也可以仕則仕可以止則止可以久則久可以

速則速孔子也皆古聖人也吾未能有行焉乃所願則

學孔子也

公孫
丑上

伯夷目不視惡色耳不聽惡聲非其

君不事非其民不使治則進亂則退橫政之所出橫民

之所止不忍居也思與鄉人處如以朝衣朝冠坐於塗

炭也當紂之時居北海之濱以待天下之清也故闢伯

夷之風者頑夫廉懦夫有立志伊尹曰何事非君何使

非民治亦進亂亦進曰天之生斯民也使先知覺後知使先覺覺後覺予天民之先覺者也予將以此道覺此民也思天下之民匹夫匹婦有不與被堯舜之澤者若已推而內之溝中其自任以天下之重也柳下惠不羞汙君不辭小官進不隱賢必以其道遺佚而不怨阨窮而不憫與鄉人處由由然不忍去也爾為爾我為我雖袒裼裸裎於我側爾焉能浼我哉故間柳下惠之風者鄙夫寬薄夫救孔子之去齊接淅而行去魯曰遲遲吾行

也去父母國之道也可以速而速可以久而久可以處而處可以仕而仕孔子也孟子曰伯夷聖之清者也伊尹聖之任者也柳下惠聖之和者也孔子聖之時者也孔子之謂集大成集大成也者金聲而玉振之也金聲也者始條理也玉振之也者終條理也始條理者智之事也終條理者聖之事也智譬則巧也聖譬則力也由射於百步之外也其至爾力也其中非爾力也

萬章下

右論人出處而以聖人折衷之

愚謂孔子之無所不可者由其有處物之義三子之各極其一偏者以其於義猶未精也

作者七人矣○子路宿於石門晨門曰奚自子路曰自

孔氏曰是知其不可而為之者與

並憲問

楚狂接輿歌

而過孔子曰鳳兮鳳兮何德之衰往者不可諫來者猶可追已而已而今之從政者殆而孔子下欲與之言趨而辟之不得與之言○太師摯適齊亞飯干適楚三飯繚適蔡四飯缺適秦鼓方叔入於河播鼗武入於漢少

師陽擊磬襄入於海

並微子

右記逸邈以明高世之行

丘何為是栖栖者與無乃為佞乎孔子曰非敢為佞也疾固也○子擊磬於衛有荷蕢而過孔氏之門者曰有心哉擊磬乎既而曰鄙哉硜硜乎莫已知也斯已而已矣深則厲淺則揭子曰果哉末之難矣

並憲問

長沮桀

溺耦而耕孔子過之使子路問津焉長沮曰夫執輿者為誰子路曰為孔丘曰是魯孔丘與曰是也曰是知津

矣問於桀溺桀溺曰子為誰曰為仲由曰是魯孔丘之徒與對曰然曰滔滔者天下皆是也而誰以易之且而與其從辟人之士也豈若從辟世之士哉耰而不輟子路行以告夫子憮然曰鳥獸不可與同羣吾非斯人之徒與而誰與天下有道丘不與易也○子路從而後遇夫人以杖荷蓀子路問曰子見夫子乎夫人曰四體不勤五穀不分孰為夫子植其杖而芸子路拱而立止子路宿殺雞為黍而食之見其二子焉明日子路行以告

子曰隱者也使子路反見之至則行矣子路曰不仕無義長幼之節不可廢也君臣之義如之何其廢之欲潔其身而亂大倫君子之仕也行其義也道之不行已知之矣○逸民伯夷叔齊虞仲夷逸朱張柳下惠少連子曰不降其志不辱其身伯夷叔齊與謂柳下惠少連降志辱身矣言中倫行中慮其斯而已矣謂虞仲夷逸隱居放言身中清廢中權我則異於是無可無不可

並微子

右記隱遯而見聖人中庸之道

治道 又見君道王道

子適衛冉有僕子曰庶矣哉冉有曰既庶矣又何加焉曰富之曰既富矣又何加焉曰教之

子路

右總以為治之道言之 亦曰為治之序

所謂治國必先齊其家者其家不可教而能教人者無之故君子不出家而成教於國孝者所以事君也弟者所以事長也慈者所以使衆也康誥曰如保赤子心誠求之雖不中不遠矣未有學養子而后嫁者

也一家仁一國興仁一家讓一國興讓一人貪戾一國作亂其機如此此謂一言僨事一人定國堯舜帥天下以仁而民從之桀紂帥天下以暴而民從之其所令反其所好而民不從是故君子有諸已而后求諸人無諸已而后非諸人所藏乎身不恕而能喻諸人者未之有也故治國在齊其家詩云桃之夭夭其葉蓁蓁之子于歸宜其家人宜其家人而后可以教國人詩云宜兄宜弟宜兄宜弟而后可以教國人詩

云其儀不忒正是四國其為父子兄弟足法而后民法

之也此謂治國在齊其家

傳九章

上老老而民興孝上

長長而民興弟上恤孤而民不倍

傳十章

慎終追遠民

德歸厚矣

學而

君子篤於親則民興於仁故舊不移則

民不偷

泰伯

上好禮則民莫敢不敬上好義則民莫敢

不服上好信則民莫敢不用情

子路

上好禮則民易使

也

憲問

君仁莫不仁君義莫不義

離婁上

右正以感化之機言之

亦曰以教言

季康子問使民敬忠以勸如之何子曰臨之以莊則敬

孝慈則忠舉善而教不能則勸為政季康子患盜問於

孔子孔子對曰苟子之不欲雖賞之不竊顏淵

右因其人而以感化之機言之亦曰以教言

為政以德譬如北辰居其所而眾星共之為政知及之

仁不能守之雖得之必失之知及之仁能守之不莊以

涖之則民不敬知及之仁能守之莊以涖之動之不以

禮未善也衛靈公

苟正其身矣於從政乎何有不能正

其身如正人何路

子

能以禮讓為國乎何有不能以禮

讓為國如禮何

仁里

右正論其所存者以出治之本言之 已下皆以政

言

愚案為政以德一章以本效相貫言重在德字知
及仁守一章以本末相資言重在仁字禮讓為國
及苟正其身二章皆以得失相對言重在讓字與
正字出治之本雖不同要皆本之吾身而已故舉

德之一字言則知仁莊禮禮讓在其中舉正身而言則所謂德者又在其中若孟子言為政不難不得罪於巨室是亦主於正身而言之然不得罪於巨室之云乃當時為政之一道耳非以此為不易之常法也

顏淵問為邦子曰行夏之時乘殷之輅服周之冕樂則韶舞放鄭聲遠佞人鄭聲淫佞人殆

衛靈公

子之武城

聞弦歌之聲夫子莞爾而笑曰割雞焉用牛刀子游對

曰昔者偃也聞諸夫子曰君子學道則愛人小人學道則易使也子曰二三子偃之言是也前言戲之耳

陽貨

道在爾而求諸遠事在易而求諸難人人親其親長其

長而天下平

上離婁

右正論其所施者以立治之本言之

愚謂親親長長所謂道也禮者所以教人履此道樂者所以教人樂此道立治之本無他焉亦曰修道以為教耳

政者正也子帥以正孰敢不正○如殺無道以就有道

何如孔子對曰子為政焉用殺子欲善而民善矣君子

之德風小人之德草草上之風必偃

並頰淵

右因其人而論其所存者以出治之本言之

亦曰以教言

君君臣臣父父子子公曰善哉信如君不君臣不臣父

不父子不子雖有粟吾得而食諸

淵

衛君待子而為

政子將奚先子曰必也正名乎子路曰有是哉子之迂

也奚其正子曰野哉由也君子於其所不知蓋闕如也

名不正則言不順言不順則事不成事不成則禮樂不興禮樂不興則刑罰不中刑罰不中則民無所措手足故君子名之必可言也言之必可行也君子於其言無所苟而已矣

子路

右因其人而論其所施者以立治之本言之

道千乘之國敬事而信節用而愛人使民以時

學而

雍

也可使南面仲弓問子桑伯子子曰可也簡仲弓曰居敬而行簡以臨其民不亦可乎居簡而行簡無乃太簡

乎子曰雍之言然

雍也

魯欲使樂正子為政孟子曰吾

聞之喜而不寐公孫丑曰樂正子強乎曰否有知慮乎
曰否多聞識乎曰否然則奚為喜而不寐曰其為人也好
善好善足乎曰好善優於天下而況魯國乎夫苟好
善則四海之內皆將輕千里而來告之以善夫苟不好
善則人將曰訑訑予既已知之矣訑訑之聲音顏色距
人於千里之外士止於千里之外則讒諂面諛之人至
矣與讒諂面諛之人居國欲治可得乎

告子下

右正論其所存者以為治之要言之

先有司赦小過舉賢才曰焉知賢才而舉之曰舉爾所

知爾所不知人其舍諸

子路

足食足兵民信之矣子貢

曰必不得已而去於斯三者何先曰去兵子貢曰必不
得已而去於斯二者何先曰去食自古皆有死民無信

不立

顏淵

右正論其所施者以為治之要言之

愚案孔子論政皆言其常而去食去兵則言其變

蓋子貢有不得已之間聖言所以處不得已之勢也

居之無倦行之以忠

顏淵

先之勞之請益曰無倦○子

夏為莒父宰問政子曰無欲速無見小利欲速則不達

見小利則大事不成

並子路

右因其人而論其所存者以為治之要言之

近者說遠者來

子路

右以治功之次第言之亦曰致治之效

子產聽鄭國之政以其乘輿濟人於溱洧孟子曰惠而不知為政歲十一月徒杠成十二月輿梁成民未病涉也君子平其政行辟人可也焉得人人而濟之故為政者每人而悅之日亦不足矣

離婁下

右以為治之大體言之

尊五美屏四惡斯可以從政矣子張曰何謂五美子曰君子惠而不費勞而不怨欲而不貪泰而不驕威而不猛子張曰何謂惠而不費子曰因民之所利而利之斯

不亦惠而不費乎擇可勞而勞之又誰怨欲仁而得仁

又焉貪君子無衆寡無小大無敢慢斯不亦泰而不驕

乎君子正其衣冠尊其瞻視儼然人望而畏之斯不亦

威而不猛乎子張曰何謂四惡子曰不教而殺謂之虐

不戒視成謂之暴慢令致期謂之賊猶之與人也出納

之吝謂之有司堯曰所謂平天下在治其國者上老老

而民興孝上長長而民興弟上恤孤而民不倍是以君

子有絜矩之道也所惡於上毋以使下所惡於下毋以

事上所惡於前母以先後所惡於後母以從前所惡於
右母以交於左所惡於左母以交於右此之謂絜矩之
道詩云樂只君子民之父母民之所好好之民之所惡
惡之此之謂民之父母詩云節彼南山維石巖巖赫赫
師尹民具爾瞻有國者不可以不慎辟則為天下僂矣
詩云殷之未喪師克配上帝儀監於殷峻命不易道得
衆則得國失衆則失國是故君子先慎乎德有德此有
人有人此有土有土此有財有財此有用德者本也財

者末也外本內末爭民施奪是故財聚則民散財散則
民聚是故言悖而出者亦悖而入貨悖而入者亦悖而
出康誥曰惟命不于常道善則得之不善則失之矣楚
書曰楚國無以為寶惟善以為寶舅犯曰亡人無以為
寶仁親以為寶秦誓曰若有一个臣斷斷兮無他技其
心休休焉其如有容焉人之有技若己有之人之彥聖
其心好之不啻若自其口出寔能容之以能保我子孫
黎民尚亦有利哉人之有技媚疾以惡之人之彥聖而

違之俾不通寔不能容以不能保我子孫黎民亦曰殆哉唯仁人放流之逆諸四夷不與同中國此謂唯仁人為能愛人能惡人見賢而不能舉舉而不能先命也見不善而不能退退而不能遠過也好人之所惡惡人之所好是謂拂人之性菑必逮夫身是故君子有大道必忠信以得之驕泰以失之生財有大道生之者衆食之者寡為之者疾用之者舒則財恒足矣仁者以財發身不仁者以身發財未有好仁而下不好義者也未有

好義其事不終者也未有府庫財非其財者也益獻子曰畜馬乘不察於雞豚伐冰之家不畜牛羊百乘之家不畜聚斂之臣與其有聚斂之臣寧有盜臣此謂國不以利為利以義為利也長國家而務財用者必自小人矣彼為善之小人之使為國家菑害並至雖有善者亦無如之何矣此謂國不以利為利以義為利也

傳十
章

哀公問政子曰文武之政布在方策其人存則其政舉其人亡則其政息人道敏政地道敏樹夫政也者蒲盧

也故為政在人取人以身修身以道修道以仁仁者人也親親為大義者宜也尊賢為大親親之殺尊賢之等禮所生也故君子不可以不修身思修身不可以不事親思事親不可以不知人思知人不可以不知天天下之達道五所以行之者三曰君臣也父子也夫婦也昆弟也朋友之交也五者天下之達道也知仁勇三者天下之達德也所以行之者一也或生而知之或學而知之或困而知之及其知之一也或安而行之或利而行之

之或勉強而行之及其成功一也子曰好學近乎知力行近乎仁知恥近乎勇知斯三者則知所以修身知所以修身則知所以治人知所以治人則知所以治天下國家矣凡為天下國家有九經曰修身也尊賢也親親也敬大臣也體羣臣也子庶民也來百工也柔遠人也懷諸侯也修身則道立尊賢則不惑親親則諸父昆弟不怨敬大臣則不眩體羣臣則士之報禮重子庶民則百姓勸來百工則財用足柔遠人則四方歸之懷諸侯

則天下畏之齊明盛服非禮不動所以修身也去讒遠色賤貨而貴德所以勸賢也尊其位重其祿同其好惡所以勸親親也官盛任使所以勸大臣也忠信重祿所以勸士也時使薄斂所以勸百姓也日省月試既稟稱事所以勸百工也送往迎來嘉善而矜不能所以柔遠人也繼絕世舉廢國治亂持危朝聘以時厚往而薄來所以懷諸侯也凡為天下國家有九經所以行之者一也凡事豫則立不豫則廢言前定則不跲事前定則不

困行前定則不疚道前定則不窮在下位不獲乎上民
不可得而治矣獲乎上有道不信乎朋友不獲乎上矣
信乎朋友有道不順乎親不信乎朋友矣順乎親有道
反諸身不誠不順乎親矣誠身有道不明乎善不誠乎
身矣誠者天之道也誠之者人之道也誠者不勉而中
不思而得從容中道聖人也誠之者擇善而固執之者
也博學之審問之慎思之明辨之篤行之有弗學學之
弗能弗措也有弗問問之弗知弗措也有弗思思之弗

得弗措也有弗辨辨之弗明弗措也有弗行行之弗篤
弗措也人一能之己百之人十能之己千之果能此道
矣雖愚必明雖柔必強

中庸二
十章

右合身心政事所存所施而詳言之

愚案大學所言其要在絜矩中庸所言其要在誠
身孔子所以告子張者主於正身愛物則仁之與
敬乃其本與

道之以政齊之以刑民免而無恥道之以德齊之以禮

有耻且格為政

仁言不如仁聲之入人深也善政不如

善教之得民也善政民畏之善教民愛之善政得民財

善教得民心

上盡心

右以政教淺深之效言之

苟有用我者朞月而已可也三年有成○如有王者必
世而後仁○善人為邦百年亦可以勝殘去殺矣○善
人教民七年亦可以即戎矣

並子路

右以政成遲速之效言之

饒子曰朞月而紀綱布三年而政化行一世而教化浹此是聖人作為久近之效七年而可即戎比之三年有勇知方者有間百年而可勝殘去殺比之必世後仁者遠甚此是善人作為久近之效

愚謂三年有勇知方是勇於義者作為之效三年而可足民是多才能者作為之效五年七年而為政於天下是師文王者作為之效皆非善人之可能也

集注以謂教之孝弟忠信之行務農講武之法則所以富之者固在教之之中矣

湯放桀武王伐紂有諸孟子對曰於傳有之曰臣弑其君可乎曰賊仁者謂之賊賊義者謂之殘殘賊之人謂之一夫聞誅一夫紂矣未聞弑君也

梁惠王下

盡信書則

不如無書吾於武成取二三策而已矣仁人無敵於天下以至仁伐至不仁而何其血之流杵也○有人曰我善為陳我善為戰大罪也國君好仁天下無敵焉南面

而征北狄怨東面而征西夷怨曰奚為後我武王之伐
殷也革車三百兩虎賁三千人王曰無畏寧爾也非敵
百姓也若崩厥角稽首征之為言正也各欲正己也焉
用戰

並盡
心下

齊人伐燕勝之宣王問曰或謂寡人勿取

或謂寡人取之以萬乘之國伐萬乘之國五旬而舉之
人力不至於此不取必有天殃取之何如孟子對曰取
之而燕民悅則取之古之人有行之者武王是也取之
而燕民不悅則勿取古之人有行之者文王是也以萬

乘之國伐萬乘之國簞食壺漿以迎王師豈有他哉避水火也如水益深如火益熱亦運而已矣○齊人伐燕取之諸侯將謀救燕宣王曰諸侯多謀伐寡人者何以待之孟子對曰臣聞七十里為政於天下者湯是也未聞以千里畏人者也書曰湯一征自葛始天下信之東面而征西夷怨南面而征北狄怨曰奚為後我民望之若大旱之望雲霓也歸市者不止耕者不變誅其君而弔其民若時雨降民大悅書曰徯我后后來其蘇今燕

虐其民王往而征之民以為將拯已於水火之中也簞
食壺漿以迎王師若殺其父兄係累其子弟毀其宗廟
遷其重器如之何其可也天下固畏齊之強也今又倍
地而不行仁政是動天下之兵也王速出令反其旄倪
止其重器謀於燕衆置君而後去之則猶可及止也

並梁

下惠王

沈同以其私問曰燕可伐與蓋子曰可子噲不
得與人燕子之不得受燕於子噲有任於此而子悅之
不告於王而私與之吾子之祿爵夫士也亦無王命而

私受之於子則可乎何以異於是齊人伐燕或問曰勸
齊伐燕有諸曰未也沈同問燕可伐與吾應之曰可彼
然而伐之也彼如曰孰可以伐之則將應之曰為天吏
則可以伐之今有殺人者或問之曰人可殺與則將應
之曰可彼如曰孰可以殺之則將應之曰為士師則可
以殺之今以燕伐燕何為勸之哉○燕人畔王曰吾甚慚
於孟子陳賈曰王無患焉王自以為與周公孰仁且智
王曰惡是何言也曰周公使管叔監殷管叔以殷畔知

而使之是不仁也不知而使之是不智也仁智周公未
之盡也而况於王乎賈請見而解之見孟子問曰周公
何人也曰古聖人也曰使管叔監殷管叔以殷畔也有
諸曰然曰周公知其將畔而使之與曰不知也然則聖
人且有過與曰周公弟也管叔兄也周公之過不亦宜
乎且古之君子過則改之今之君子過則順之古之君
子其過也如日月之食民皆見之及其更也民皆仰之
今之君子豈徒順之人從為之辭

公孫
下

宋小國也今

將行王政齊楚惡而伐之則如之何孟子曰湯居亳與葛為鄰葛伯放而不祀湯使人問之曰何為不祀曰無以供犧牲也湯使遺之牛羊葛伯食之又_不以祀湯又使人問之曰何為不祀曰無以供粢盛也湯使亳眾往為之耕老弱饋食葛伯率其民要其有酒食黍稻者奪之不授者殺之有童子以黍肉餉殺而奪之書曰葛伯仇餉此之謂也為其殺是童子而征之四海之內皆曰非富天下也為匹夫匹婦復讎也湯始征自葛載十一

征而無敵於天下東面而征西夷怨南面而征北狄怨
曰奚為後我民之望之若大旱之望雨也歸市者弗止
芸者不變誅其君弔其民如時雨降民大悅書曰徯我
后后來其無罰有攸不為臣東征綏厥士女匪厥玄黃
紹我周王見休惟臣附於大邑周其君子實玄黃于匪
以迎其君子其小人簞食壺漿以迎其小人救民於水
火之中取其殘而已矣太誓曰我武惟揚侵于之疆則
取于殘殺伐用張于湯有光不行王政云爾苟行王政

四海之內皆舉首而望之欲以為君齊楚雖大何畏焉

滕文公下

季氏將伐顓臾冉有季路見於孔子曰季氏將

有事於顓臾孔子曰求無乃爾是過與夫顓臾昔者先

王以為東蒙主且在邦域之中矣是社稷之臣也何以

伐為冉有曰夫子欲之吾二臣者皆不欲也孔子曰求

周任有言曰陳力就列不能者止危而不持顛而不扶

則將焉用彼相矣且爾言過矣虎兕出於柙龜玉毀於

櫝中是誰之過與冉有曰今夫顓臾固而近於費今不

取後世必為子孫憂孔子曰求君子疾夫舍曰欲之而

必為之辭丘也聞有國有家者不患寡而患不均不患

貧而患不安蓋均無貧和無寡安無傾夫如是故遠人

不服則修文德以來之既來之則安之今由與求也相

夫子遠人不服而不能來也邦分崩離析而不能守也

而謀動干戈於邦內吾恐季孫之憂不在顓臾而在蕭

牆之內也

季氏

魯欲使慎子為將軍孟子曰不教民而

用之謂之殃民殃民者不容於堯舜之世一戰勝齊遂

有南陽然且不可慎子勃然不悅曰此則滑釐所不識也曰吾明告子天子之地方千里不千里不足以待諸侯諸侯之地方百里不百里不足以守宗廟之典籍周公之封於魯為方百里也地非不足而儉於百里大公之封於齊也亦為方百里也地非不足也而儉於百里今魯方百里者五子以為有王者作則魯在所損乎在所益乎徒取諸彼以與此然且仁者不為況於殺人以求之乎君子之事君也務引其君以當道志於仁而已

告子

春秋無義戰彼善於此則有之矣征者上伐下

也敵國不相征也

盡心
下

右明興師之義

愚謂弔民伐罪興師之義也湯武之師是已春秋
彼善於此者假義而已若魯欲伐齊則貪昧而不
知義齊欲滅燕則暴虐而不合義季氏欲伐公臣
則強僭而犯義宋不度德量力而稱兵於倍地之
四鄰是又衡行賊義以取敗亡者也


子之所慎齋戰疾 子行三軍則誰與子曰暴虎馮河
死而無悔者吾不與也必也臨事而懼好謀而成者也

並述
而

右臨兵制勝之道

愚謂行師之要主敬而已夫子之所慎敬也夫子
之言臨事而懼亦敬也敬則心有主宰而能謀故
好謀而成必先之以懼也

四書通旨卷六



覆校官編修臣項家達

校對官檢討臣郭寅

謄錄監生臣藍嘉瑄